

SÎRÎRÎ KAARETA PAULO NÎMENUKA'PÎ ÉFESO PONKON PIA

Sîrîrî kaareta menuka'pî Pauloya moropai yarima'pîiya innape Jesus ku'nenan Éfeso ponkon pia. Roma po atarakkannîto' yewî' ta tîwanî tanne, imenuka'pîiya. Î' kai'ma Paapa esenumenkato' wanî ekaremekî'pîiya. Tamî'nawîronkon pemonkonyamî' esa' pe Jesus kupîiya pî' eeseurîma'pî. Moropai ta'pîiya nîrî inkamoro wanî Jesus yarakkîrî, tiwin to' enasa' ye'nen, tiaronkon pemonkonyamî'ya morî to' yeseru era'ma e'pai awanî.

1 ¹Uurî Paulo, Jesus Cristo naipontî'pî itu'se Paapa wanî ye'nen. Sîrîrî kaareta menuka'ya amîrî'nîkon pia, Paapa nîmo'ka'san tîmîrî ton pe, Éfeso cidaderî ponkon pia. Amîrî'nîkon wanî innape Jesus Cristo kupî pî' tîiko'mansenon pe.

²Manni' epe'mîra Paapa nîtîrî moropai tîwanmîra e'nîto' tîrî Uyunkon Paapaya moropai Uyepotorîkon Jesus Cristo yunya yu'se wai aapia'nîkon.

Upîika'tî Tîuya'nîkon Pî' Paapa Esenumenka'pî Cristo Wenai

³Paapa, Uyepotorîkon Jesus Cristo yun yapurîpai'nîkon. Maasa pra ka' winîpainon, Morî Yekaton Wannî tîrî tîuya wenai uurî'nîkon koneka'pîiya morî pe. Ikupî'pîiya Cristo nîkupî'pî wenai. ⁴Maasa pra pena, sîrîrî pata koneka tîuya rawîrî, Paapaya uurî'nîkon menka'pî, Jesus Cristo nîkupî ton wenai. Morî pe pu'kuru e'nîto'pe moropai î' rî imakui'pî unku'pî'pîkon ton pra e'nîto'pe tîrawîrî umenka'pîiya'nîkon. Paapaya uurî'nîkon sa'nama'pî kure'ne. ⁵Mîrîrî ye'nen eesenumenka'pî pena tînmukuyamî' pe uurî'nîkon kupî tîuya pî', Jesus Cristo wenai. Mîikîrî esenumenka'pî itu'se tîwanî ye'nen. ⁶Mîrîrî ye'nen uurî'nîkonya yapurî e'pai awanî kure'ne. Maasa pra morî tîrî'pîiya epe'mîra, tînmu kure'ne tînsa'nama wenai.

⁷Maasa pra uurî'nîkon wanî Jesus Cristo ne'ma'san pe, tîmînî i'kamo tîuya yai pakî'nan pona. Mîrîrî wenai unku'pî'pîkon imakui'pî kupî'pî Paapaya tîwanmîra. Mîrîrî kupî'pîiya maasa pra upî'nîkon morî pe

pu'kuru tîwanî ye'nen. ⁸Mararî pra tîwakîri pe pu'kuru uurî'nîkon pia itîrî'pî Paapaya, epu'nen pe pu'kuru tîwanî ye'nen. ⁹Moropai anî nepu'tî pepîn epu'to'pe uurî'nîkonya ikupî'pîiya. Î' kai'ma ikupî tîuya pî' Jesus Cristo nîkupî'pî wenai, manni' pî' eesenumenka'pî pena. Mîrîrî yenpo'pîiya uupia'nîkon. ¹⁰Moropai tamî'nawîrî ekonekasa' yai, ikupîiya ta'pî tîuya yawîrî. Tamî'nawîronkon rumakaiya Cristo yenya'. Tamî'nawîrî ka' po tîiko'mansenon moropai non po tîiko'mansenon rumakaiya itenya', tamî'nawîronkon esa' pe awe'to'pe. ¹¹Tamî'nawîrî sîrîrî kupî'pî Paapaya, pena î' kai'ma teesenumenka'pî yawîrî. Mîrîrî ye'nen mîîkîrîya uurî'nîkon menka'pî tîpemonkono pe e'nîto'pe Cristo wenai. Mîrîrî kupî'pîiya itu'se tîwanî ye'nen. ¹²Mîrîrî kupî'pîiya tapurîto'pe uurî'nîkon „Judeuyamî'ya,„ morî pe, ipîkku pe Paapa e'to' yapurîto'pe. Maasa pra e'mai' pe innape Cristo ku'sa'nîkon, moropai inîmîkî pî' ko'mannî, iipia ko'mannîto'pe.

¹³Amîrî'nîkon yarakkîrî nîrî awe'kupî'pî mîrîrî warantî. Î' pensa yairon Cristo yekare e'pîika'tînto' eta'pîya'nîkon yai, ikupî'pîya'nîkon innape. Moropai mîrîrî yai, Paapaya Morî Yekaton Wannî tîrîuya taasa' tîuya yawîrî itîrî'pî aapia'nîkon. Tîmîrî pe awanîkon ekareme'nen pe itîrî'pîiya. ¹⁴Morî Yekaton Wannî tîrî'pîiya imakui'pî yapai tîpemonkonoyamî' ye'ma'pî tîuya ekareme'nen pe. Moropai tîpia inkamoro yarî tîuya ekareme'nen pe itîrî'pîiya. Mîrîrî wenai uurî'nîkonya epu'tî î' taasa' tîuya yawîrî Paapaya ikupî. Mîrîrî ye'nen morî pe Paapa e'to' pî' yapurî e'pai awanî kure'ne.

Paulo Epîremato'

^{15,16}Mîrîrî ye'nen uurî epîrema sîrîrî. Innape Uyepotorîkon Jesus Cristo kupî pî' awanîkon moropai tamî'nawîrî manni'kan innape iku'nenan sa'namaya'nîkon yekare etasau'ya pata pai, epîrema pî' uuko'mamî tîtî'napanse pra. —Morî pe man —tauya Paapa pî' amîrî'nîkon wenai. Sîrîrî warantî uurî enpenata tîwîrî rî amîrî'nîkon pî'. ¹⁷Moropai Paapa Uyepotorîkon Jesus Cristo yun manni' morî pu'kuru pî' esatîuya. Amîrî'nîkon pia epu'nen pe awe'to'kon ton tîito'peiya. Î' kai'ma tîwanî ekareme'nen ton Morî Yekaton Wannî tîito'peiya. Mîrîrî warantî neken î' kai'ma Paapa wanî epu'tîya'nîkon inî' panpî'. ¹⁸Epîrema sîrîrî. Esatîuya Paapa pî' mîîkîrîya anepu'tîkon pepîn epu'tîya'nîkon emapu'to'pe. Maasa pra amîrî'nîkon yanno'pîiya ipatîkarî aako'mamîkonpa Cristo pia, moropai tamî'nawîrî intîrî yapisîkonpa. Tamî'nawîrî mîrîrî epu'tîya'nîkon emapu'to'peiya esatîuya sîrîrî. ¹⁹Moropai epîrema sîrîrî î' kai'ma kure'ne Paapa meruntîri wanî epu'tîkonpa. Mîrîrî tîmeruntîri tîrî'pîiya uurî'nîkon pia, innape tîku'nenan pia, (morî pe uyewankon konekato'pe tîuya). ²⁰Mîrîrî tîmeruntîri yenpo'pî Paapaya pena kure'nan, î' pensa Cristo pîmî'sa'ka tîuya yai. Moropai mîrîrî tîmeruntîri ke mîîkîrî tîrî'pîiya tîmeruntîri winî eereutato'pe ka' po. ²¹Miarî si'ma tamî'nawîronkon yentai ikupî'pîiya. Manni'kan epu'nenan, moropai ipîkkukon, moropai

tiaronkon esa' pe tîwe'sanon, tamî'nawîronkon inkamoro sîrîrî pata po tîiko'mansenon yentai ikupî'pîiya. Moropai inkamoro yentai neken pra, tîise maasa amenan pata koneka Paapaya yai, ipîkku pe tîwe'sanon wanî kupî sîrîrî. Inkamoro yentai nîrî ikupî'pîiya. ²²Paapaya tamî'nawîron kupî'pî Cristo ma're awe'to'pe, moropai Cristo maimu yawîrî to' ko'manto'pe. Maasa pra Cristo neken tîrî'pîiya tînmenka'san ton pe, inkamoro tîpemonkonoyamî' tamî'nawîronkon yepotorî pe awe'to'pe. ²³Maasa pra imenka'san wanî Cristo waikatoi pe, itesa' warantî. Moropai inkamoro pu'pai pe Cristo ko'mamî tîmîrî pe to' wanî ye'nen. Mîrîrî warantî tamî'nawîrî awe'to' yawîrî to' wanî, tîise Cristo ton pîn awanî ya, awe'to' yawîrî awanî pepîn. Maasa pra mîîkîrî ko'mamî tamî'nawîrî tînkoneka'pî yepoi, tamî'nawîronkon ko'mannî'nen pe.

Sa'mantanto' Winîpai E'pîika'tînto'

2 ¹Pena amîrî'nîkon wanî'pî isa'manta'san pe, maasa pra Paapa maimu yawîrî aako'mansa'kon pra awanîkon ye'nen, imakui'pî kupî pî' aako'mamîkon ye'nen. ²Mîrîrî yai, sîrîrî pata po tîiko'mansenon ko'mamî'pî warantî aako'mamî'pîkon. Inkamoro yaipontînen, Makui maimu yawîrî aako'mamî'pîkon. Mîîkîrî Makui wanî sîrîrî pata po o'ma'kon, tîpoitîrîtonon yaipontînen pe, moropai Paapa maimu yawîrî pra tîiko'mansenon yaipontînen pe. ³Tamî'nawîrî uurî'nîkon nîrî ko'mamî'pî pena, imakui'pî kupî pî' inkamoro ko'mamî'pî warantî. Itu'se e'nîto' yawîrî anku'pai uurî'nîkon esenumenka'pî. Î' kai'ma esenumenkan yawîrî ko'mannî'pî. Tiaronkon pî' teekore'ma'pî warantî uurî'nîkon pî' nîrî Paapa ekore'ma'pî, mîrîrî imakui'pî pe e'nîto' wenai. Mîrîrî wenai uurî'nîkon antaruma'tîpai Paapa wanî'pî. ^{4,5}Tîise mîîkîrîya uurî'nîkon era'ma'pî tî'noko'pî pe, kure'ne usa'nama tîuya'nîkon ye'nen. Ipatîkarî enen ko'mannîto' ton tîrî'pîiya. Teuren pena imakui'pî unku'pî'pîkon wenai, isa'manta'san warantî e'nî tanne, uurî'nîkon ko'manto' ton tîrî'pîiya Jesus Cristo yarakkîrî. Mîrîrî epe'mîra Paapa nîtîrî'pî wenai, awe'pîika'tîsa'kon. ⁶Paapaya Jesus Cristo pîmî'sa'ka yai, uurî'nîkon nîrî pîmî'sa'ka'pîiya yarakkîrî. Moropai upata'se'kon ton tîrî'pîiya, ka' po si'ma tamî'nawîronkon ko'mannî'nen pe e'nîto'pe Cristo pokonpe. ⁷Paapaya mîrîrî kupî'pî maasa pra tîwîrî tamî'nawîronkonya epu'to'pe, mararî pra morî tîrî tîuya uupia'nîkon epe'mîra. Kure'ne usa'nama'pîiya'nîkon moropai upî'nîkon mîrîrî yenpo'pîiya Jesus Cristo nîkupî'pî wenai. ⁸Maasa pra epe'mîra Paapa nîtîrî'pî wenai amîrî'nîkon e'pîika'tîsa', innape ikupîya'nîkon ye'nen. Itu'se amîrî'nîkon e'to' wenai pra, î' anku'pî'pîkon wenai pra, tîise amîrî'nîkon repa'pîiya epe'mîra. ⁹Awe'pîika'tîsa'kon pepîn, morî anku'pî'pîkon wenai. Mîrîrî ye'nen anî' wanî pepîn mîî pe mîrîrî pî'. ¹⁰Maasa pra morî pe uurî'nîkon wanî Paapa nîkoneka'san pe, Jesus Cristo piawonkon pe e'nî ye'nen. Moropai mîîkîrî yarakkîrî ko'mannî wenai, morî kupî pî' ko'mannîto'pe ukoneka'pîiya'nîkon. Mîrîrî morî pî' Paapa esenumenka'pî pena ikupî pî' ko'mannîto'pe.

Cristo Pemonkono Pe Judeuyamí' Pepín Ena

¹¹Enpenatátí í' kai'ma pena awaní'píkon pí'. Amírí'níkon esenposa' pra man Judeuyamí' pe. Mírírí ye'nen Judeuyamí' mîí pe tíwe'sanonya taa apí'níkon: —Paapa pemonkono pe pra awaníkon maasa pra amerekon pí'pí ya'tí to'ya pra awaní'pí —taa to'ya. Tesa'kon pí' neken to' atapurí, tēwankon yawon pí' pra. ¹²Enpenatátí, pena aako'mamí'píkon aminke Cristo pí'. Paapa pemonkonoyamí' imenka'san yonpa pe pra awaní'píkon. Mírírí ye'nen í' ta'pí Paapaya to' pí' yawírí ikupí'píiya tîpemonkonoyamí' ton pe, tíise amírí'níkon ton pe pra. Iwinípainon morí nímíkíya'níkon pra awaní'píkon. Aako'mamí'píkon sírírí pata po Paapa tepu'se pra. Mírírí warantí awaní'píkon pena. ¹³Pena amírí'níkon ko'mansa' aminke Paapa pí' tíise Cristo sa'manta'pí, imíní eti'kamo'pí pakí'nan pona. Mírírí inkupí'pí wenai típia amírí'níkon enepí'píiya.

¹⁴Maasa pra mîíkírí rí Cristoya tíwanmíra awe'to'kon ton tírí'pí. Akupí'píiya'níkon Judeuyamí' moropai Judeuyamí' pepín yarakkírí tiwinan warantí. Tiwin pemonkon warantí aako'mamíkonpa teesiyu'pí'se pra. Mîíkíríya eseyaton pí' awe'to'kon yaretí'ka'pí. ¹⁵Maasa pra Moisés nurí'tíya yenupanto', Judeuyamí' yeseru yaretí'ka'píiya. Tarípai Jesus Cristo wenai tiwin akupí'píiya'níkon. Mírírí ye'nen amenan pe amírí'níkon kupí'píiya tîpemonkono pe. Mírírí warantí tíwanmín tírí'píiya. ¹⁶Pakí'nan pona tíisa'manta yai, Cristoya eseyaton pí' e'níto' yaretí'ka'pí. Maasa pra morí pe uurí'níkon, Judeuyamí', Judeuyamí' pepín ena emapu'tí'píiya Paapa yarakkírí, tînkupí'pí wenai. Moropai ukupí'píiya'níkon tiwinan pemonkon warantí. ¹⁷Mírírí ekareme'se Cristo iipí'pí. Moropai mírírí ekareme'pítí'píiya tamí'nawíronkon pí' tíwanmíra aako'mamíkonpa. Ekaremekí'píiya amírí'níkon Judeuyamí' pepín pí', aminke Paapa pí' tíwe'sanon. Moropai Judeuyamí' pí' nírí ekaremekí'píiya, aminke pra ipí' tíwe'sanon pí'. ¹⁸Cristo níkupí'pí wenai uurí'níkon tamí'nawíronkon Judeuyamí' moropai Judeuyamí' pepín wítí tarípai Paapa pia. Maasa pra Morí Yekaton Wanníya uurí'níkon yarí, mîíkírí ríya. Iní'rí uma'nípanenkon ton pra.

¹⁹Mírírí ye'nen amírí'níkon Judeuyamí' pepín waní pepín ka'ran pe tíwe'sen warantí. Tíise amírí'níkon waní tarípai Paapa pemonkonoyamí' pe. Inmukuyamí' pe awaníkon! ²⁰Amírí'níkon waní Paapa yewí' konekasa' warantí. Moropai anna, Jesus naipontí'san moropai profetayamí' waní tí' warantí yapítaní'to'pe itíisa'. Maasa pra anna winípai itekare etasa'ya'níkon ye'nen. Tíise Jesus Cristo waní kure'nan tí' warantí tamí'nawírí uurí'níkon yapítaní'nen pe. ²¹Mîíkíríya uurí'níkon ko'mannípi tamí'nawírí morí pe e'níto'pe. Moropai mîíkíríya iní' panpí' tepu'to'pe uurí'níkonya ikupí' tîmírí tonpe típia eturumakanto'pe. ²²Mírírí warantí nírí amírí'níkon waní itewí' pe, Jesus Cristo yarakkírí awaníkon ye'nen. Tiaronkon innape iku'nenan

pokonpe tiwin itewí' pe ukonekaiya'níkon, ita Paapa ko'manto' ton, Morí Yekaton Wanní wenai. Mírírí warantí uurí'níkon waní.

Pauloya Itekare Ekaremekí Judeuyamí' Pepín Pí'

3 ¹Mírírí ye'nen uurí Paulo, Jesus Cristo poitírí waní sírírí tarí atarakanníto' ta itekare ekaremekíuya ye'nen amírí'níkon, Judeuyamí' pepín pí'. ²Upí' morí pe tíwaní ye'nen, iku'to'peuya Paapaya itírí'pí uupia, epu'tí pí' naatíi. Amírí'níkon Judeuyamí' pepín kore'ta esenyaka'mato'pe itírí'píiya. ³Paapaya í' kai'ma ikupí títuya ekaremekí'pí upí' Judeuyamí' pepín yarakkírí. Sírírí itekare, sírírí típose aní' nepu'tí pepín menuka'píuya aapia'níkon mararí, kure'ne pra. ⁴Mírírí erenkasa'ya'níkon ya, epu'tí'píya'níkon sírírí. Í' kai'ma manni' aní' nepu'tí pepín, Cristo wenai Paapa níkupí ton pí' esenumenka epu'tí'píya'níkon. ⁵Pena patapai aní' nepu'tí'pí pepín sírírí. Tííse sírírí patapai, Morí Yekaton Wanní wenai Paapaya yenpo'pí, sírírí epu'to'pe tinaipontí'sanya moropai Paapa maimu ekareme'nenanya. ⁶Aní' nepu'tí pepín waní see warantí: Cristo níkupí'pí yekare eta títuya'níkon wenai Judeuyamí' pepínya tíwe'píika'títo'kon ton yapisí e'painon Judeuyamí' pokonpe Paapa winípai. Inkamoro waní nírí Paapa munkíyamí' pe, tiwin pemonkon warantí to' e'to'pe Judeuyamí' yarakkírí. Moropai Jesus Cristo níkupí'pí wenai, inkamoro nírí píika'tí Paapaya. ⁷Epe'míra títírí tírípí Paapaya uupia, moropai kure'ne meruntí ke urepa'píiya, tímaimu ekareme'to'peuya. Mírírí wenai, Paapaya uurí yaipontí'pí sírírí itekare ekareme'to'peuya.

⁸Teuren uurí waní tanne tamí'nawíronkon Paapa pemonkonoyamí' ma're, tííse Paapaya itírí'pí uupia tímaimu ekareme'to'peuya Judeuyamí' pepín pí'. Kure'ne aní'ya epu'tí yentai Cristo nítírí ton mírírí ekaremekíuya Judeuyamí' pepín pí'. ⁹Moropai í' kai'ma Judeuyamí' pepín píika'tí Paapaya ekaremekíuya tamí'nawíronkonya epu'to'pe, manni' aní' nepu'tí pepín pena patapainon. Paapaya neken epu'tí'pí pena, tamí'nawíron konekatíponya. ¹⁰Tííse sírírí innape iku'nenan Judeuyamí' moropai Judeuyamí' pepín tímoka'san wenai, tíwírí epu'nen pe tíwaní epu'tí ipíkkukonya. Manni'kan ka' po tíiko'mansenonya, inseríyamí'ya taa: —Kure'ne epu'nen pe Paapa waní. Mírírí taa to'ya, innape Paapa ku'nenan era'ma títuya'níkon wenai. ¹¹Mírírí epu'nen pe awaní esepu'tí. Uyepotoríkon Jesus Cristo yarima'píiya wenai, tíwírí teesenumenkato' yawírí. ¹²Mírírí ye'nen Cristo yarakkírí e'ní wenai, innape ikupí ye'nen, Paapa pia uurí'níkon erepamí e'painon eranne' pe pra. ¹³Mírírí ye'nen tauya sírírí apí'níkon. Teesewankono'mai pra e'tí, tarí uurí e'taruma'títo' pí', maasa pra amírí'níkon ton pe e'taruma'tí sírírí. Tííse tamí'nawírí uyarakkírí awe'kupí manni' pí' taatausinpai e'tí, amírí'níkon ton pe e'taruma'tí ye'nen.

Kure'ne Cristoya Uurî'nîkon Sa'nama

¹⁴Tamî'nawîrî mîrîrî wenai Paapa yapurîuya, epîrema irawîrî si'ma uyese'mu pona teenai. ¹⁵Manni' Paapa, tamî'nawîrî tîpemonkonoyamî' ka' ponkon pia itîînen moropai non ponkon. Tînmukuyamî' kai'ma to' esatî'pîiya. ¹⁶Mararî pra antîrî ton moro awanî aapia, anî'ya iku'ne'tî yentai. Mîrîrî yawîrî to' meruntîri ton tîkî tauya Paapa pî'. Morî Yekaton Wannî wenai itîkî to' yewan ya' tauya. ^{17,18}Esatîuya nîrî innape ikupîya'nîkon wenai Cristo ko'manto'pe ayewankon ya'. Moropai epîrema sîrîrî amîrî'nîkonya Cristo e'sa'namato' epu'to'pe inî' panpî'. Maasa pra mîkîrî Cristoya asa'nama'pîkon epu'tî pî' naatîi, kure'ne. Mîrîrî ye'nen amîrî'nîkon rumakaiya pepîn, ayapîtanîpîkon pî' aako'mamî. Mîrîrî epu'tîya'nîkon yu'se wanî sîrîrî morî pe, tamî'nawîronkon Paapa pemonkonoyamî' pokonpe si'ma, î' kai'ma Cristo e'sa'namato' wanî kure'ne. Awene' tuna wanî warantî, moropai tu'na awanî warantî, moropai kusan ikî'pî ton pra awanî warantî, moropai kawîne wî' wanî warantî, Cristoya usa'namato'kon wanî ikî'pî ton pra. ¹⁹Inna, epîrema sîrîrî amîrî'nîkon pona, maasa pra sîrîrî Cristo e'sa'namato' epu'tîya'nîkon yu'se wanî ye'nen, teuren tamî'nawîrî epu'tîya'nîkon eserîke pra tîise. Tîise inî' panpî' epu'tîya'nîkon yu'se wanî, Paapa pia eeturumaka ye'ka pe e'to' yawîrî, tîwarantî aako'mamîkonpa, tiaronkon sa'nama pî'. Sîrîrî warantî esatîuya Paapa pî'.

²⁰Moropai kure'ne taatausinpai Paapa yapurîuya. Imeruntîri uurî'nîkon, inmo'ka'san pia intîrî'pî wenai, moropai Jesus Cristo nîkupî'pî wenai yapurîpai'nîkon man. Mîkîrîya unesatî'pîkon yentai itîrîiya epu'tîuya. Moropai î' kai'ma esatî pî' esenumenka'nî'pî yentai itîrîiya. ²¹Mîrîrî ye'nen kure'ne Paapa yapurî pî' ko'mannî yu'se wai. Tamî'nawîronkon Cristo piawonkonya yapurî e'pai man tîwîrîrî, tîrumakai pra, sîrîrî pankonya moropai maasa teesenposanonya. Mîrîrî warantî awe'kupî yu'se wai.

Tiwî E'nî Cristo Yarakkîrî

4 ¹Mîrîrî ye'nen esatîuya sîrîrî apî'nîkon. Atarakkannîto' yewî' ta Jesus Cristo wenai awanî manni'ya esatî morî pe aako'mamîkonpa, î' kai'ma itu'se Paapa e'to' yawîrî. Mîrîrî yu'se awanî'pî amîrî'nîkon yanno tîuya yai. ²Mîrîrî ye'nen tîwîrî ako'mantî mîi pe pra, eranmîra moropai teekore'masen pe pra. Morî pe tiaronkon sa'namatî, moropai î' taato' to'ya yapîtanîpî pî' ako'mantî teekore'mai pra. ³Tiwî eesenumenkato'kon ku'tî. Maasa pra mîrîrî warantî awanîkonpa Morî Yekaton Wannîya itîrî'pî aapia'nîkon. Teesiyu'pî'se aako'mamîkon namai tîwanmîra ako'mantî.

⁴Tiwî uurî'nîkon wanî Paapa pemonkonoyamî' pe, teuren arinîke e'nî tanne.

Moropai tiwin uurí'níkon pinunpanen waní Morí Yekaton Wanní.
Moropai tiwin ka' pona wítinto' nímíki pí' ko'manní. Miarí morí pe
e'ní kupí sírírí. Mírírí ton pe uurí'níkon yanno'pí Paapaya.

⁵ Moropai Uyepotoríkon waní tiwin.

Moropai innape Cristo ku'sa'níkon, tiaron pepín.

Moropai tiwin uurí'níkon esenpatakonato' waní, Cristo pemonkono
pe e'ní ekareme'nen pe.

⁶ Moropai Paapa, mîkírí yapurí, tiaron yapurí pepín. Mîkírí rí waní
tamí'nawíronkon uurí'níkon yun pe moropai uyesa'kon pe awaní,
moropai itu'se tíwe'to' kupí emapu'tíiya. Moropai uupia'níkon
aako'mamí.

⁷ Tiwin pí' si'ma, uurí'níkonya ukaisarí'níkon Cristo nítírí yapísí'pí,
itíríiya píkirí. ⁸ Paapa maimu e'menukasaya taasa' yawírí itírí'píiya.

Taasai'ya man:

Teenuku yai ka' pona,

mîkírí Cristo ena'pí teyatnon yentai,

tamí'nawíronkon pemonkonyamí' rawírí.

Moropai pemonkonyamí' pia tîntírí tírípíiya

Sl 68.18

taasai'ya man. ⁹ Kai'ma esenumenkan pí' naatí Cristo enuku'pí pí' ka'
pona? E'mai' pe awautí'pí non yo'koi. ¹⁰ Mírírí típo mîkírí rí enuku'pí
ka' pona tamí'nawíron yepoi, ipíkku pe tíwanípa kai'ma. Moropai
tamí'nawírí pata kaisarí non po, ka' po aako'mamí sírírí, tamí'nawíronkon
yentai tíwanípa. ¹¹ Moropai tîntírí tírípíiya típemonkonoyamí' pia,
pata ponkon kaisarí, to' esenyaka'mato'pe tínaipontíkon pe, moropai
tiaronkon e'to'pe Paapa maimu ekareme'nenan pe, moropai tiaronkon
kupí'píiya típemonkono pe pemonkonyamí' mo'kanenan ton pe. Moropai
tiaronkon kupí'píiya típemonkonoyamí' ko'manní'nenan ton pe,
moropai to' yenupanen ton pe. ¹² Insamoro kupí'píiya típemonkonoyamí'
piika'tínenan ton pe teesenyaka'mato' ku'to'pe to'ya. Moropai morí pe
Cristo waní warantí to' e'to'pe iwaikkatoi pe to' waní ye'nen, itesa' warantí.
¹³ Mírírí ye'nen uyenupakon to'ya yai tamí'nawírí uurí'níkon ena tiwin
esenumenkato' yarakkírí innape ikupí ye'nen. Moropai uyenupakon
to'ya yai, mîkírí Paapa munmu epu'tí uurí'níkonya kupí sírírí iní' panpí'.
Moropai uurí'níkon akípí kupí sírírí Cristo warantí e'nîto'pe. Morí pe Cristo
yeseru waní manni' warantí uyeserukon ena. ¹⁴ Mírírí warantí uurí'níkon
yenupasa' to'ya wenai, moreyamí' warantí uurí'níkon waní pepín, í'
epu'nenan pepín warantí. Maasa pra seru'ye'kon warayo'konya yenupanto'
pí' inna taa, uurí'níkon yenku'tí to'ya mírírí yenupanto' to'ya wenai. Mírírí
waní inna warantí tíise inna taatíponkon yarí to'ya ataka'manto' ya'. Tíise
iní'rí inna taa pepín yenupanto' to'ya pí', innape Paapa kupí ye'nen. ¹⁵ Tíise

eseurîman yairon pî' neken, yairî uyonpakon sa'namai'ma. Mîrîrî warantî ikupî'nîkon ya, tamî'nawîrî morî pe e'nî Cristo ton pe. Manni' uurî'nîkon yaipontînen, upu'paikon pe tîwanî ye'nen. ¹⁶Moropai uurî'nîkon wanî itesa' warantî. Tamî'nawîrî e'to' yawîrî, ma'tîkî' pe pra. Tîise tamî'nawîrî e'waikkatoimîrî uyesa'kon wanî ya, morî pe aako'mamî. Esenyaka'manto' kupî morî pe maasa pra tamî'nawîrî morî pe e'to' yawîrî awanî ye'nen. Mîrîrî warantî Cristo waikatoi pe e'nî ye'nen. Imaimu yawîrî ko'mannî ya morî pe esenyaka'man, maasa pra tiaronkon sa'nama pî' ko'mannî ye'nen.

Cristo Nîrîrî Amenan Ko'mannîto'

¹⁷Mîrîrî ye'nen amîrî'nîkon pî' tauya sîrîrî Uyepotorîkon maimu pe. Taa pî' uuko'mamî meruntî ke see warantî: Inî'rî manni'kan Paapa epu'nenan pepîn ko'mamî manni' warantî aako'mamîkon namai. Maasa pra inkamoro esenumenkato' wanî î' pe pra rî. ¹⁸Moropai inkamoro esenumenka imakui'pî kupî pî'. Ipatîkaron Paapa nîrîrî'pî inkamoro ko'manto' ton pra awanî. Maasa pra pakko pe Paapa epu'tî to'ya pra to' wanî ye'nen. Moropai itu'se pra to' wanî maasa pra sa'man pe to' yewan wanî ye'nen. ¹⁹Inkamoro enasa' man aweppe'to' ton pra tamî'nawîron imakui'pî tînkupîkon pî'. Nura tesorukon kupî pî' to' ko'mamî. Moropai inî' panpî' ikupîkonpa to' eturumakasa' wanî. Mîrîrî warantî itu'se tîwe'to'kon pî' to' ko'mamî, tone' imakui'pî anku'pai to' wanî. Mîrîrî warantî Paapa epu'nenan pepîn yeseru wanî.

²⁰Mîrîrî kupî pî' aako'mamîkonpa Cristoya ayenupasa'kon pra man. ²¹Tîise amîrî'nîkonya eta'pî Cristo yekare. Moropai innape ikupî'pîya'nîkon imaimu yairon pî' eesenupa'pîkon, iteseru pî'. ²²Moropai pena amîrî'nîkon esenupa'pî î' kai'ma penaro' ayeserukon kupî pî' aako'mamîkon rumakakonpa. Mîrîrî ayeserukonya ataruma'tî'pîkon iwinîkîi pra inî' panpî'. ²³Mîrîrî winîpai ayewankon moropai esenumenkato'kon miakanma'nîkon e'pai awanî amenan pe. ²⁴Mîrîrî ye'nen amenan aponkon yeka'maya'nîkon warantî amenan ayeserukon ton yeka'matî ayewankon ya' manni' Paapa yeseru warantî. Mîrîrî ye'nen yairî aako'mamîkon, yairî Paapa ko'mamî warantî.

²⁵Mîrîrî ye'nen seru'ye' pe teeseurîmai pra e'tî inî'rî. Eeseurîmakon ya, yairî eeseurîmakon yuwatî ayonpakon yarakkîrî. Maasa pra tamî'nawîrî uurî'nîkon wanî Cristo waikatoi pe, ipemonkonoyamî' yonpa pe.

²⁶Î' pensa eekore'makon ya, ayentai eekore'mato'kon kî'tîrîi imakui'pî kupîya'nîkon namai.

Sl 4.4

Eekore'makon ya, wei ewomî pîkîrî kako'mantî. Tîise eekonekakon yuwatî. ²⁷Mîrîrî warantî imakui'pî pata'se' ton kî'tîtî ayewan ya', Makui esenyaka'ma ko'mannîpî namai. ²⁸Anî' e'sa' ya ama'ye' pe, inî'rî mîîkîrîya yama'runpa e'pai pra man. Tîise eesenya'ma neken e'pai

awanî, morî pe tîiko'mamîpa. Moropai mîrîrî warantî mîikîrîya î' ton pînon pîika'tî e'painon.

²⁹Eeseurîmakon ya se' tapairî nura mai pî' eeseurîmakon e'pai pra man. Tîise morî mai yapurîya'nîkon yuwatî. Mîrîrî ke tiaronkon pîika'tîkonpa, moropai inî' panpî' epu'nen pe to' e'to'pe. ³⁰Moropai yairî ma're Paapa winîpainon Morî Yekaton Wannî tîku'se pra e'tî. Maasa pra mîikîrî Morî Yekaton Wannî wanî Paapa pemonkono pe uurî'nîkon wanî ekareme'nen pe. Moropai mîikîrî wanî ye'nen, Paapaya uurî'nîkon mo'ka imakui'pî yapai epu'tî'nîkon, umo'kaiya'nîkon weiyu yai. ³¹Mîrîrî ye'nen tamî'nawîrî eekore'mato'kon rumakatî. Moropai awe'mu'tunpato'kon rumakatî. Moropai aatasi'sirunpato'kon rumakatî. Mîrîrî ye'ka wenai tîwentaimepî'se pra e'tî. Tiaronkon winîkîi eeseurîmato'kon rumakatî. Moropai tamî'nawîrî mîrîrî imakui'pîkon rumakatî. ³²Tîise morî pe e'tî, tiaronkon yarakkîrî eranmîra. Moropai î' rî to' nîkupî'pî awinîkîi'nîkon mîrîrî ku'tî aawanmîra'nîkon. Î' kai'ma tîwanmîra Jesus Cristo wenai Paapaya ankupî'pîkon kupî'pî warantî iku'tî.

Paapa Munkîyamî' Ko'mamî Yeseru

5 ¹Amîrî'nîkon wanî Paapa munkîyamî' pe iwakîri pe pu'kuru. Mîrîrî ye'nen o'non ye'ka pe Paapa wanî manni' warantî awanîkon yuwatî. ²Mîrîrî warantî î' rî kupîya'nîkon kaisarî, morî pe tiaronkon sa'nama pî' aako'mamîkon yu'se wai. Maasa pra Cristoya uurî'nîkon sa'nama'pî. Mîikîrî e'tîrî'pî uurî'nîkon ton pe tîwarîrî. To' nîtîrî a'pusin Paapa wakîri pe, moropai Paapa yapurî pe to' nîpo'tî warantî aasa'manta'pî, kure'ne usa'nama tîuya'nîkon ye'nen. Mîrîrî warantî tiaronkon sa'namaya'nîkon e'pai awanî.

³Paapa pemonkono pe awanîkon ye'nen, imakui'pî pe se' tapairî wîri'sanyamî' yarakkîrî ke'tî, moropai wîri'sanyamî', se' tapairî warayo'kon yarakkîrî ke'tî. Moropai nura tîku'se pra e'tî, moropai kure'ne î' yu'se kîseka'nunkatî. Mîrîrî warantî Paapa pemonkonoyamî' ko'mamî e'pai pra man. ⁴Moropai eeseurîmakon ya, nura pî' kîseurîmatî, tîise Paapa pî' —Morî pe man, Paapa —ka'tî neken. ⁵Mîrîrî warantî wîri'sanyamî' yarakkîrî tîwe'sanon tîno'pî pepîn yarakkîrî, moropai nura pî' teesenumenkasananya, moropai kure'ne î' yu'se teeseka'nunkasanonya Paapa winîpainon î' yapisî pepîn, î' pensa aaipî ya tamî'nawîronkon esa' pe. Maasa pra inkamoro ye'kakon wanî mia' ke ikonekasa' yapurînenan pe. Paapa yapurî to'ya pepîn. ⁶Mîrîrî ye'nen morî pe ko'manpai'nîkon, anî'ya uyenku'tîkon namai se' tapairon mai ke. Maasa pra Paapaya tîmaimu yawîronkon pepîn taruma'tî kupî sîrîrî. ⁷Mîrîrî ye'nen inkamoro ye'kakon kore'ta tîwe'se pra e'tî.

⁸Maasa pra pena amîrî'nîkon ko'mamî'pî inkamoro ko'mamî manni' warantî ewaron ya'. Tîise î' pensa Paapa pemonkono pe eena'pîkon patapai morî pe ayeserukon enasa' a'ka ta. Mîrîrî ye'nen ako'mantî

morí pe, Paapa pemonkono pe awaníkon ye'nen. ⁹Mírîrí warantí aako'mamíkon ya, tiaronkon píika'tíya'níkon morí pe to' e'to'pe moropai ayeserukon waní yairí moropai eeseurímato'kon waní morí pe, seru'ye' pe pra. ¹⁰Í' rí Paapa wakíri pe tíwe'sen epu'tíya'níkon yuwatí. ¹¹Moropai imakui'pí to' yeseru, se' tapairon kî'ku'tí. Tííse aronne ekareme'tí yairí pra awaní epu'to'pe to'ya. ¹²Mírîrí ye'ka ama' pe to' níkupí pí' eseuríman eseríke pra awaní. Maasa pra yeppe'ní'ton pe awaní ye'nen. ¹³Uurí'níkon waní to' yeseru yenponenan pe ta'níkon ya to' pí': —Mírîrí waní morí pe pra. Manni' a'ka pe tíwe'senya tamí'nawírí tera'masen pepín yenpo manni' warantí. ¹⁴Maasa pra a'ka pe tíwe'senya tamí'nawíron esera'ma emapu'tí. Mírîrí ye'nen pena awe'menuka'pí see warantí:

Amírí awetun ko'mannípi manni' apakakí.

Amírí tíísa'mantai tííko'mansen e'mí'sa'kakí.

Moropai Cristoya amírí kupí a'ka ta aako'mamípa taasai'ya man.

¹⁵Mírîrí ye'nen maasa era'matí morí pe í' kai'ma aako'manto'kon menkakonpa. Pakko pe kako'mantí tííse epu'nen pe ako'mantí. ¹⁶Morí kupíya'níkon yuwatí, maasa tíkai pra. Maasa pra tu'ke imakui'pí ku'nenan man akore'ta'níkon. Inkamoroya aama'tínípi'kon namai iku'tí. ¹⁷Pakko pe tíwe'se pra e'tí. Tííse í' kupíya'níkon yu'se Uyepotoríkon e'to' mírîrí epu'tí. ¹⁸Kure'ne mai' pí' teetínse pra e'tí. Maasa pra mírîríya aako'manto'kon taruma'tí. Tííse Morí Yekaton Wanní esenyaka'mato'pe apí'níkon eturumakatí iipia. ¹⁹Tiaronkon innape Jesus ku'nenan yarakkírí eseurímatí eren ke. Eserenkatí Paapa maimu e'menukasa' erenkato' pí' moropai Paapa yapuríto' pí'. Moropai Jesus yeseru pí' teeseurímasen eren pí' eserenkatí Paapa yapurí pe. —Morí pe pu'kuru man, Paapa —kai'ma eserenkatí. ²⁰Mírîrí warantí Paapa uyunkon yapurítí tîwírí, tamí'nawíron ku'sai'ya wenai moropai Uyepotoríkon Jesus Cristo wenai.

Warayo'kon Moropai To' No'pítonon

²¹Ayonpakon nírí maimukon yawírí ako'mantí, Cristo namaya'níkon wenai.

²²Amírí'níkon wírí'sanyamí' pí' tauya sírîrí, tînyo kenankon pí', anyokon maimu yawírí ako'mantí, Uyepotoríkon namaya'níkon wenai.

²³Maasa pra inyo waní tîno'pí pu'pai pe, tîpemonkonoyamí' pu'pai pe Cristo waní manni' warantí. ²⁴Mírîrí ye'nen ipemonkonoyamí', inmo'ka'san ko'mamí Cristo maimu yawírí. Mírîrí warantí nírí tînyo kenankon wírí'sanyamí' ko'mamí e'pai awaní í' taasa' tînyoya yawírí.

²⁵Tîno'pí kenankon warayo'kon pí' tauya: ano'píkon sa'nama pí' ako'mantí, tîpemonkono pe tînmo'ka'san sa'nama'pí Cristoya warantí. To' sa'nama tîuya ye'nen tîwarírí awe'tírí'pí, inkamoro píika'típa. Aasa'manta'pí morí pe to' e'to'pe. ²⁶Innape tîmaimu kupí to'ya era'ma tîuya ye'nen, imakui'pí to' níkupí'pí rona'píiya, morí pe to' e'to'pe. ²⁷Mírîrí warantí ikupí'píiya tîpia to'

enepípa morí pe teken, imakui'pí ton pra. Tímírí pe to' waní ye'nen, imakui'pí, nura tíku'se pra to' ko'mamí yu'se awaní'pí, tíwarantí. ²⁸Mírírí warantí tino'píkon sa'nama pí' warayo'kon ko'mamí e'pai awaní. Tíwe'sa'namakon manni' warantí tino'píkon sa'nama to'ya e'pai awaní mírírí. Tino'pí sa'namanen waní ya, awe'sa'nama nírí. ²⁹Aní' esewanmírí pepín tíwárírí, tííse awe'sa'nama. Mírírí warantí nírí títomonkonoyamí' sa'nama Cristoya. ³⁰Ipemonkono pe e'ní ye'nen usa'namaíya'níkon mírírí. ³¹Pena Paapaya ta'pí: —Warayo' no'píta yai, eemo'ka tun moropai tisan piapai moropai tino'pí yarakkírí eena.

Asakí'ne to' tííse tiwinan warantí to' enasa' mírírí

Gn 2.24

—taasai'ya man. ³²Esenumenkanto' mírírí kure'nan, maasa pra Cristo pí' eseuríma moropai inmo'ka'san pí'. ³³Moropai amírí'níkon warayo'kon pí' tauya nírí, ano'píkon sa'namatí awe'sa'namakon manni' warantí. Moropai wírí'sanyamí' pí' tauya, anyokon namaya'níkon e'pai awaní.

Moreyamí' Moropai To' Yunkonyamí'

6 ¹Moreyamí' pí' tauya sírírí moropai maasaronkon pí': Ayunkon asankon maimu yawírí ako'mantí, Cristo nímó'ka'san pe awaníkon ye'nen. Mírírí kupí pí' aako'mamíkon ya, yairí aako'mamíkon. ^{2,3}Pena Paapaya tímaimu ekaremekí'pí unkupíkon pe: —Ayunkon asankon namatí —ta'pí Paapaya. —Mírírí warantí aako'mamíkon ya, morí pe aako'mamíkonpa akupíya'níkon moropai kusan pe aako'manto'kon waní sírírí non po

Dt 5.16

—ta'píiya. Mírírí waní ipíkku pe unkupíkon pe, maasa pra Paapaya ta'pí e'mai' pe mírírí yawírí e'ní ya, morí tíríiya, taasa' tíuya yawírí.

⁴Moropai to' yunkonyamí' pí' tauya: wei kaisarí anmukukon panamatí Uyepotoríkon yeseru ke irumaka pata pe pra. Tííse to' tekatonkai pra e'tí, tííse morí pe to' yenupatí.

Ipoitírí Moropai Ikaraiwarí

⁵Amírí'níkon to' poitírítonon akaraiwaríkon maimu yawírí iku'tí to' namaya'níkon ye'nen. Moropai mírírí kupíya'níkon yai, aawo'ma'takon pe pra, yairí iku'tí Cristo yapuríya'níkon manni' warantí iku'tí. ⁶Aapia awaníkon yai neken inamaya'níkon kai'ma ke'tí. Tííse aapia'níkon pra tííse inamatí. Manni' itu'se Paapa e'to' yawírí iku'tí awakíríkon pe, maasa pra Cristo pemonkono pe awaníkon ye'nen. ⁷Tííse awakíríkon pe esenyaka'matí, akaraiwaríkon ton pe, í' kai'ma Uyepotoríkon ton pe eesenyaka'makon manni' warantí. Manni'kan warayo'kon ton pe pra neken eesenyaka'makon. ⁸Maasa pra amírí'níkonya tiwin pí' si'ma akaisarí'níkon Uyepotoríkon

winîpainon yapisî kupî sîrîrî, manni'kan tesa' kenankonya moropai itesa' pînonya. Yapisîya'nîkon kupî sîrîrî, î' kai'ma ankupî'pîkon yepe'pî pe.

⁹Amîrî'nîkon, to' karaiwarîyamî', apoitîrîkon tîwakîmai e'tî. Yairî pra iteseru era'maya wenai, ipî' teekore'maj pra see warantî ikupîya pra awanî ya, ataruma'tûuya, tekai pra. Mîrîrî tî'napannî'tî. Maasa pra amîrîya epu'tî mîrîrî moro to' esa' moropai ayesa' wanî ka' po. Mîkîrîya tamî'nawîronkon ko'mannîpî se' kaisarî, e'sentai pra.

Surara Warantî Ekore'manto'

¹⁰Tarîpai tauya sîrîrî apî'nîkon. Meruntî ke ako'mantî Uyepotorîkon meruntîri kure'nan yarakkîrî, ipemonkono pe awanîkon ye'nen. ¹¹Mîrîrî ayuwa'nen ton aponkon yeka'matî, manni' surara epontîsa' manni' warantî. Tamî'nawîrî mîrîrî Paapa nîtîrî yapi'tî, meruntî ke awanîkonpa, Makuiya ayenumîkon namai. Maasa pra mîkîrîya uurî'nîkon yenku'tî tûuya yuwa ko'mannîpî tu'ke ite'ka. ¹²Maasa pra uurî'nîkon epîto' wanî pemonkon yarakkîrî pra tîise Makui meruntîri winîkîi moropai tîpoitîrî pe uurî'nîkon yaipontînenan winîkîi, moropai manni'kan imawariyamî' moropai maariwa'yamî' winîkîi. Manni'kan ka' poro taasa'senon meruntîkon, imakui'san winîkîi uurî'nîkon ekore'ma. ¹³Mîrîrî ye'nen tamî'nawîrî Paapa nîtîrî yapi'tî. Yapi'sa'ya'nîkon ya, imakui'pî erepamî yai apona'nîkon meruntî ke awanîkon, ayenumîya'nîkon pepîn. Teuren amîrî'nîkon yarakkîrî eekore'ma tîise ayenumîya'nîkon pepîn. Mîrîrî ye'nen meruntî ke e'tî.

¹⁴Mîrîrî ye'nen teekonekai e'tî. Paapa winîpainon yairon pe tîwe'sen aworîmî yewa'tîkî, seru'ye' pe tîwe'sen winîkîi eeseya'namapa. Moropai yairî ayeseru ton yeka'makî, mîrîrî sa'man aropo'ta yuwa'nen ton yeka'maya warantî. ¹⁵Moropai ekonekatî î' kai'ma Paapaya upîka'tîsa'kon ekaremekîkonpa tiaronkon pî', morî pe to' enato'pe Paapa yarakkîrî. Mîrîrî itekare ekaremekîya wanî a'sa'sa' yeka'maya warantî satippe aako'mamîkonpa aatare'mokon namai. ¹⁶Moropai innape ikupî pî' ako'mantî. Mîrîrî wanî manni' awapu pe yapi'sa'ya manni' warantî. Mîrîrî ye'nen tamî'nawîrî Makui rupeya apo'tîkon eserîke pra awanî. Tîise apona'nîkon eerepamî yai, eesi'nîpî. ¹⁷Moropai mîrîrî awe'pîka'tîto'kon ton yapi'tî, manni' aro' apu'paikon yuwa'nen ton yeka'makonpa yapisîya'nîkon warantî. Moropai Morî Yekaton Wannî nîtîrî yapi'tî akasuparaikon pe. Mîrîrî wanî Paapa maimu pe. ¹⁸Tamî'nawîrî sîrîrî ku'tî eepîremakon ke. Paapa pî' awe'pîka'tîto'kon ton esatî. Epîrematî tîwîrîrî Morî Yekaton Wannî meruntîri yai. Mîrîrî ye'nen ari'ke' pe e'tî, yairî ma're teenai pra. Moropai epîrematî tîwîrîrî tamî'nawîronkon innape Paapa ku'nenan pona.

¹⁹Moropai epîrematî nîrî upona, Paapaya tîmaimu ekaremekîuya umeruntîri ton tîto'pe eranne' pe si'ma ekaremekîuya namai. Mîrîrî unekaremekî e'to'pe aronne epu'to'pe to'ya. Mîrîrî to' nepu'tî'pî pepîn

epu'to'pe to'ya, epîrematî. ²⁰Mîrîrî ekaremekîuya wenai tarî wanî sîrîrî atarakkannîto' yewî' ta. Tîîse upona epîrematî tarî si'ma itekare ekaremekî pî' uuko'manto'pe, meruntî ke, eranne' pe pra e'to'pe. Maasa pra mîrîrî itekare ekareme'to'peuya uurî yaipontî'pî Jesusya.

²¹Uyونpakon Tíquico manni' yairon, Uyepotorîkon esenyaka'mato' pî' teesenyaka'masenya tamî'nawîrî uyekare ekaremekî apî'nîkon, î' kai'ma tarî uuko'mamî yekare epu'tîkonpa. ²²Mîrîrî ekareme'se akore'ta'nîkon yarimauya sîrîrî. Î' kai'ma tamî'nawîrî anna yekare ekaremekîiya yai, aatausinpakonpa.

Paulo Esekaremekî

²³Uyونkon Paapaya moropai Uyepotorîkon Jesus Cristoya amîrî'nîkon pia tíwanmîn tîrî yu'se wai, uyonpayamî'. Moropai î' kai'ma tiaronkon sa'nama pî' aako'manto'kon ton tîrî to'ya yu'se wai. Moropai innape tîkupîkon pî' aako'mamîkonpa itîrî to'ya yu'se wai. ²⁴Moropai epe'mîra Paapa nîtîrî ko'mamî yu'se wai tamî'nawîrî manni'kan Uyepotorîkon Jesus Cristo yapurî pî' tîko'mansenon pia.